




Anotada en el Libro de Resoluciones de la Junta de Gobierno Local, con el núm: RES/AYT/11224/2021 12/05/2021

Área / Unidad MOVILIDAD URBANA MU1100C NCB	Documento 85115100W5	
Código de verificación  096I 1522 0U60 6L57 15RR	Expediente 851/2021/22	
	Fecha 09-05-2021	

## **PRÓRROGA DAS MEDIDAS EXTRAORDINARIAS DE FLEXIBILIZACIÓN PARA A INSTALACIÓN DE TERRAZAS E 2ª MODIFICACIÓN DAS INSTRUCIÓN.S.-**

### **ANTECEDENTES**

Primeiro.- A Alcaldía-Presidencia mediante Decreto de 12.03.2020, declarou a situación de extraordinaria e urxente necesidade como consecuencia da pandemia provocada polo COVID-19. Incluía medidas precisas para garantir a seguridade e salubridade públicas, o funcionamento dos servizos imprescindibles e, en xeral, todas as que se consideren necesarias para facer fronte á crise sanitaria actual e ás súas consecuencias.

Logo da declaración do estado de alarma e a aprobación de sucesivas prórrogas, o Goberno do Estado, o 28 de abril aprobou o denominado Plan para a Transición cara a unha Nova Normalidade, que se aplicou gradualmente en catro fases.

Segundo.- A Orde SND/386/2020, do 3 de maio, que flexibiliza determinadas restricións sociais e determina as condicións de desenvolvemento da actividade de comercio comerciante polo miúdo e de prestación de servizos, así como das actividades de hostalería e restauración nos territorios menos afectados pola crise sanitaria ocasionada polo COVID-19, regula, no seu artigo 12, a reapertura das terrazas dos establecementos de hostalería e restauración, limitando ao cincuenta por cento as mesas permitidas no ano inmediatamente anterior en base á correspondente licenza municipal.

O Consello da Xunta de Galicia apreciou, en acordo do día 12 de xuño, como autoridade sanitaria, que a Comunidade Autónoma de Galicia, como unidade territorial, está en condicións de superar a fase III do Plan para a desescalada das medidas extraordinarias adoptadas para facer fronte á pandemia de COVID-19 e, por tanto, en condicións de entrar na «nova normalidade».

Na súa condición de autoridade sanitaria, adoptou, a través do mencionado acordo, medidas de prevención para facer fronte sen dilación, tras a superación da fase III, ás necesidades urxentes e extraordinarias derivadas da crise sanitaria do COVID-19, de xeito que quede garantido, por unha banda, que a cidadanía evite comportamentos que xeren riscos de propagación da enfermidade e, por outra banda, que as actividades en que poida xerarse un maior risco de transmisión comunitaria da enfermidade se desenvolvan en condicións que permitan en todo momento previr os riscos de contaxio.

No apartado 3.11 do Anexo regula os aforamentos dos establecementos de hostalaría e restauración:

### *3.11. Establecementos de hostalaría e restauración.*

*1. Os establecementos de hostalaría e restauración non poderán superar o setenta e cinco por cento da súa capacidade para consumo no interior do local.*



2. O consumo dentro do local poderá realizarse en barra ou sentado en mesa, ou agrupacións de mesas, e deberase asegurar o mantemento da debida distancia de seguridade interpersoal entre clientes ou, de ser o caso, grupos de clientes situados na barra ou entre as mesas ou, de ser o caso, agrupacións de mesas.

3. As terrazas ao aire libre dos establecementos de hostalaría e restauración limitarán a súa capacidade ao oitenta por cento das mesas permitidas no ano inmediatamente anterior con base na correspondente licenza municipal ou do que sexa autorizado para este ano, no caso que a licenza sexa concedida por primeira vez.

Consideraranse terrazas ao aire libre todo espazo non cuberto ou todo espazo que, estando cuberto, estea rodeado lateralmente por un máximo de dúas paredes, muros ou paramentos.

No caso de que o establecemento de hostalaría e restauración obtivese o permiso do concello para incrementar a superficie destinada á terraza ao aire libre, poderase incrementar o número de mesas previsto no primeiro parágrafo deste número 3, respectando, en todo caso, unha proporción do oitenta por cento entre mesas e superficie dispoñible e sempre que se manteña o espazo necesario para a circulación peonil no tramo da vía pública en que se sitúe a terraza.

4. En todo caso, deberá asegurarse que se mantén a debida distancia de seguridade interpersoal entre as mesas ou, de ser o caso, agrupacións de mesas. A ocupación máxima será de vinte e cinco persoas por mesa ou agrupación de mesas.

A resolución de 12 de xuño de 2020, da Secretaría Xeral Técnica da Consellería de Sanidade, pola que se dá publicidade ao Acordo do Consello da Xunta, de 12 de xuño de 2020, sobre medidas de prevención necesarias para facer fronte á crise sanitaria ocasionada polo COVID-19, unha vez superada a fase III do Plan para a transición cara a unha nova normalidade, dispón que os efectos se manterán ata o levantamento da declaración de situación de emerxencia sanitaria de interese galego.

Terceiro.- O Goberno Municipal considerou procedente manter e adaptar as medidas extraordinarias de flexibilización para a instalación de terrazas, mentres se manteña a declaración de situación de emerxencia sanitaria, estendéndooas a algunha zona non prevista na Resolución anterior (resolución RES/AYT/5339/2020, do 8 de maio de 2020), así como ás rúas nas que non é posible a instalación de terrazas e as rúas declaradas peonís entre o 1 de xullo e o 15 de setembro, polo que a resolución da Concellaría de Urbanismo, Vivenda, Infraestrutura e Mobilidade do 26 de xuño de 2020 (RES/AYT/7790/2020) aprobou as **instrucións** para instalar terrazas **durante a situación de emerxencia sanitaria de interese galego** declarada por Resolución de 12 de xuño de 2020, da Secretaría Xeral Técnica da Consellería de Sanidade, pola que se dá publicidade ao Acordo do Consello da Xunta, de 12 de xuño de 2020, sobre medidas de prevención necesarias para facer fronte á crise sanitaria ocasionada polo COVID-19, unha vez superada a fase III do Plan para a transición cara unha nova normalidade.

Mediante resolución do 07.09.2020 (RES/AYT/10938/2020) prorrogouse a vixencia das instrucións ata o 31 de xaneiro de 2021.

Cuarto.- Como reforzo das medidas sanitarias, mediante resolución do 07.01.2021 (RES/AYT/227/2021), por delegación da Xunta de Goberno Local, esta Concellaría Delegada modificou as instrucións citadas, incluíndo a posibilidade de desenvolvemento lonxitudinal da terraza de cada establecemento hostaleiro.



Quinto.- O informe da Dirección Xeral de Saúde Pública do 13 de xaneiro de 2020 situaba as taxas de incidencia acumuladas a 3, 7 e 14 días en niveis moi elevados, cunha clara tendencia ascendente. Neste contexto, o informe recomenda adoptar as medidas correspondentes ao nivel máximo de restricións nos concellos, como o da Coruña, de máis de 10.000 habitantes cunha incidencia acumulada a 14 días superior a 250 casos por cada 100.000 habitantes ou que evolucionan de xeito acelerada cara a ese nivel.

Neste contexto de incremento das medidas que pretenden restrinxir ao máximo a interacción social e a permanencia de grupos de persoas en espazos de uso público, e no mesmo sentido que a resolución desta Concellaría Delegada do 8 de xaneiro de 2021 que prorrogou a duración das peonalizacións ou declaración de vías de preferencia peonil de diversas rúas da cidade ata a finalización do estado de alarma, prorrogouse novamente a vixencia das instrucións mentres continuara a situación de crise sanitaria, e de xeito concreto ata o vindeiro 9 de maio de 2021, ás 00.00 horas, data de finalización do estado de alarma declarado polo Real Decreto 956/2020, do 3 de novembro. Nesta resolución de prórroga, ditada o 18 de xaneiro do 2021 (RES/AYT/1806/2021), indicouse que de prorrogarse o estado de alarma, a vixencia destas instrucións adaptaríaase tamén a esta circunstancia.

Sexto.- No momento actual, e coa finalización o día 9 de maio do 2021 da prórroga do estado de alarma establecida polo Real decreto 956/2020, do 3 de novembro, a Xunta de Galicia como autoridade sanitaria nesta crise, e no marco da situación de emerxencia sanitaria de interese galego declarada pola Resolución do 12 de xuño de 2020 da Secretaría Xeral Técnica da Consellería de Sanidade, ven de aprobar a través da súa Consellería de Sanidade, a *ORDE do 7 de maio de 2021 pola que se establecen medidas de prevención específicas como consecuencia da evolución da situación epidemiolóxica derivada da COVID-19 na Comunidade Autónoma de Galicia tendo en conta a finalización da prórroga do estado de alarma establecida polo Real decreto 956/2020, do 3 de novembro* (DOG núm. 86-Bis do 07.05.2021).

Resulta evidente que, ante o inminente decaemento do estado de alarma e dado que a evolución da situación epidemiolóxica e sanitaria na Comunidade Autónoma de Galicia así o exige, é imprescindible a adopción por parte das autoridades sanitarias autonómicas de medidas de prevención coas cales facer fronte á crise sanitaria derivada da COVID-19. A adopción das medidas recollidas nesta Orde vén determinada pola evolución da situación epidemiolóxica e sanitaria na Comunidade Autónoma de Galicia, segundo resulta do Informe da Dirección Xeral de Saúde Pública do 6 de maio de 2021; imperan na adopción destas medidas os principios de prudencia e precaución que impregnan a regulación desta materia na lexislación sanitaria e téñense en conta as especificidades propias da comunidade autónoma.

Sétimo.- No apartado Noveno da dita Orde do 7 de maio do 2021 establécese en relación ao *Plan de hostalaría segura*, posto en marcha a través da Orde do 25 de febreiro de 2021, que continuará a desenvolverse nas súas liñas fundamentais, e que, consonte coa súa consideración de plan sanitario para os efectos do previsto no artigo 80 da Lei 8/2008, do 10 de xullo, de saúde de Galicia, as entidades locais participarán na súa aplicación e cumprimento mediante o exercicio das súas competencias de control sanitario establecidas na lei.

No Anexo I da dita Orde de 7 de maio do 2021 recóllense varias medidas de prevención específicas, como por exemplo as seguintes:

#### 1.- Obrigas xerais:

1.3. Distancia de seguridade interpersoal. Deberá cumprirse a medida de mantemento da distancia de seguridade interpersoal establecida pola Lei 2/2021, de 29 de marzo, de medidas urxentes de prevención, contención e coordinación para facer fronte á crise sanitaria ocasionada pola COVID-19, de polo menos, 1,5



metros ou, na súa falta, medidas alternativas de protección física con uso de máscara, de hixiene adecuada e etiqueta respiratoria.

### 3. Limitacións de capacidade e medidas de prevención específicas por sectores.

#### 3.22. Hostalaría e restauración.

1. A prestación de servizos de hostalaría e restauración en bares, cafetarías e restaurantes axustarase ás seguintes regras, en función dos datos epidemiolóxicos existentes nos correspondentes concellos:

d) Nos concellos enumerados na letra D do anexo II da presente orde (entre os que está o concello da Coruña), os establecementos poderán prestar servizos de recollida no local e consumo a domicilio, de entrega a domicilio, de terraza co setenta e cinco por cento (75 %) da capacidade máxima permitida con base na correspondente licenza municipal ou do que sexa autorizado para este ano, no caso de que a licenza sexa concedida por primeira vez, e tamén servizo no interior cunha ocupación do 50 %. Non se poderá prestar servizo na barra.

En todo caso, deberá asegurarse que se mantén a debida distancia de seguridade interpersoal entre as mesas ou, de ser so caso, agrupacións de mesas, e respectaranse nas mesas as limitacións que se establezan para grupos de persoas no correspondente ámbito territorial.

O horario de peche ao público será ás 23.00 horas. Os establecementos que teñan título municipal habilitante de restaurante disporán da opción de ampliar o seu horario ata as 1.00 horas exclusivamente para o servizo de ceas, sempre que cumpran os requisitos que se determinen para este caso nas medidas aprobadas pola consellería competente en materia de sanidade no marco do Plan de hostalaría segura e sen que poidan admitirse novos clientes a partir das 00.00 horas.

Os establecementos poderán prestar servizos de recollida no local e consumo a domicilio ou ben servizo de entrega a domicilio ata as 1.00 horas. Neste caso, a permanencia nestes establecementos deberá ser a estritamente necesaria. En todo caso, evítanse aglomeracións e controlárase que consumidores e empregados manteñan a distancia de seguridade establecida co fin de evitar posibles contaxios.

Oitavo.- Cómpre á vista de todo o exposto, que o goberno municipal, consonte coa evolución da pandemia provocada polo coronavirus e da crise sanitaria que aínda non rematou, da situación especial que segue a padecer o sector da hostalaría e restauración respecto das medidas restritivas do aforamento dos locais e terrazas e de horarios reducidos, así como a necesidade de gardar distancias de seguridade interpersoal, prorrogue a vixencia das instrucións para a instalación de terrazas durante a situación de emerxencia sanitaria de interese galego declarada por Resolución do 12 de xuño de 2020 da Secretaría Xeral Técnica da Consellería de Sanidade. En cumprimento dos principios de necesidade e de proporcionalidade, esta prórroga da vixencia das instrucións deberá ser obxecto de seguimento e avaliación continua, co fin de garantir a súa adecuación á evolución da situación epidemiolóxica e sanitaria. Como consecuencia deste seguimento e avaliación, a vixencia poderá ser novamente prorrogada ou rematada, segundo a evolución da dita crise sanitaria e a adopción de novas medidas de prevención.

Noveno.- Polo mesmo motivo, coa finalidade de seguir favorecendo a actividade de hostalaría nun contexto de prevención xeral e cumprimento estrito das medidas sanitarias sinaladas, ao tempo que non se descoida a calidade do espazo urbano e se garante a convivencia das actividades hostaleiras coa utilización do espazo público por persoas que camiñan, esta resolución de prórroga engade unha posibilidade de instalación de terrazas no espazo previsto para estacionamento, aínda que exista un ancho de beirarrúa



que permitise a localización nela dunha terraza. Trátase con isto de favorecer a mobilidade peonil pola beirarrúa (que non contaría xa con terraza de optar o establecemento por situala no espazo de aparcamento), sen prexuízo para a actividade hostaleira.

Cómpre polo tanto engadir un apartado 7º que teña en conta a posibilidade de instalar, mediante solicitude individualizada e a través de autorización expresa, terrazas en prazas de aparcamento situadas diante dos locais de hostalaría, de xeito excepcional e aínda que non se dea a condición do ancho da beirarrúa indicada no apartado 3º.1 das instrucións. Así, cómpre modificar as instrucións para acoller esta nova posibilidade de instalación e adaptala ao momento vixente da pandemia.

Á vista de todo o anterior, en virtude das competencias que legalmente me foron delegadas pola Xunta de Goberno Local, mediante acordo adoptado na súa sesión do 28.06.2019 (BOP núm. 124, do 03.07.2019), e no exercicio das funcións atribuídas pola Lei 7/1985, do 2 de abril, reguladora das bases do réxime local, dito a seguinte

### **RESOLUCIÓN**

**Primeiro.- Prorrogar** a vixencia das *Instrucións para a instalación das terrazas durante a situación de emerxencia sanitaria de interese galego declarada por Resolución do 12 de xuño de 2020 da Secretaría Xeral Técnica da Consellería de Sanidade*, na súa redacción aprobada por resolución desta Concellaría Delegada de 07.01.2021 (RES/AYT/227/2021), durante a vixencia das medidas de prevención específicas que adopte a autoridade sanitaria autonómica en relación co sector da hostalaría e restauración, tendo en conta que de se modificar ou de rematar das ditas medidas de prevención, a vixencia destas instrucións adaptárase tamén a estas circunstancias.

**Segundo.- Engadir** un apartado 7º ás *Instrucións para a instalación das terrazas durante a situación de emerxencia sanitaria de interese galego declarada por Resolución do 12 de xuño de 2020 da Secretaría Xeral Técnica da Consellería de Sanidade*, na súa redacción aprobada por resolución desta Concellaría Delegada de 07.01.2021 (RES/AYT/227/2021) do seguinte teor:

*“7º De xeito excepcional, poderán instalarse terrazas en prazas de aparcamento situadas diante dos locais de hostalaría, aínda que non se dea a condición do ancho da beirarrúa indicada no apartado 3º.1 destas instrucións. Esta instalación será incompatible coa instalación de terraza na beirarrúa.*

*7.1 A autorización da instalación da terraza estará sometida á condición de que o número total de prazas de aparcamento afectadas pola instalación da/s terraza/s non supere o 50% das existentes na dita vía.*

*7.2. O espazo para ocupar nas prazas de aparcamento coincidirá coa fronte do local e non poderá sobresaír da liña das prazas de aparcamento marcada en cada rúa e non se poderán ocupar zonas de carga e descarga, PMR, aparcamentos de motos nin prazas de residentes en zona ORA.*

*7.3 Poderase realizar un desenvolvemento lonxitudinal máximo da terraza de cada establecemento, incluídas as proteccións laterais, podendo sobordar a fronte do local sempre que se cumpran os requisitos indicados no apartado 4º.1 destas instrucións.*

*7.4. Será necesaria a instalación dunha tarima con proteccións laterais e na fronte da calzada. A altura mínima da tarima será de 15 centímetros ao lado da calzada e deberá de quedar ao nivel na zona do bordo da beirarrúa. Só se permitirá, ademais da tarima, a instalación de mesas e cadeiras e no seu caso antucas.*

*7.5. As persoas solicitantes deberán presentar a seguinte documentación:*



- a) *Solicitud segundo modelo municipal*
- b) *Plano de situación e esbozo do que se pretende instalar*
- c) *Memoria explicativa coa superficie, número de mesas e cadeiras, material da tarima e proteccions, así como as antucas que no seu caso se pretendan instalar.*
- d) *Póliza e pago do seguro de responsabilidade civil no que se inclúa a terraza que se pretende instalar.*
- e) *Documento que acredite a conformidade das persoas titulares dos dereitos dos locais ou fincas lindeiras, no caso de desenvolvemento lonxitudinal da terraza.*

*7.6 As terrazas situadas en prazas de aparcamento, que deberán ser obxecto de autorización expresa polo órgano municipal competente e resolveranse por orde de presentación, poderanse instalar ata a anulación destas instrucións ou ata que se fixe outro prazo expreso por resolución do dito órgano, segundo a variación das circunstancias sanitarias ou de calquera outra natureza que estiveran vixentes no momento da autorización da instalación.”*

A Coruña, na data da sinatura electrónica deste documento

Por delegación da Xunta de Goberno Local (acordo do 28.06.2019, BOP núm. 124 do 03.07.2019)  
O concelleiro delegado de Urbanismo, Infraestrutura, Vivenda e Mobilidade